

杜 牧 全 集

(唐) 杜 牧 著

出版社

卷 一

阿房宫赋

六王毕，四海一。蜀山兀，阿房出。覆压三百余里，隔离天日。骊山北构而西折，直走咸阳。二川溶溶，流入宫墙。五步一楼，十步一阁。廊腰缦回，檐牙高啄。各抱地势，钩心斗角。盘盘焉，囿囿焉，蜂房水涡，矗不知乎几千万落。长桥卧波，未云何龙？复道行空，不霁何虹？高低冥迷，不知东西。歌台暖响，春光融融；舞殿冷袖，风雨凄凄。一日之内，一宫之间，而气候不齐。

妃嫔媵嫱，王子皇孙，辞楼下殿，辇来于秦，朝歌夜弦，为秦宫人。明星荧荧，开妆镜也；绿云扰扰，梳晓鬟也；渭流涨腻，弃脂水也；烟斜雾横，焚椒兰也；雷霆乍惊，宫车过也，辘辘远听，杳不知其所之也。一肌一容，尽态极妍，缦立远视，而望幸焉。有不见者，三十六年。

燕、赵之收藏，韩、魏之经营，齐、楚之精英，几世几年，剽掠其人，倚叠如山。一旦不能有，输来其间。鼎铛玉石，金块珠砾，弃掷逦迤，秦人视之，亦不甚惜。嗟乎！一



人之心，千万人之心也。秦爱纷奢，人亦念其家。奈何取之尽锱铢，用之如泥沙？使负栋之柱，多于南亩之农夫；架梁之椽，多于机上之工女；钉头磷磷，多于在庾之粟粒；瓦缝参差，多于周身之帛缕；直栏横槛，多于九土之城郭；管弦呕哑，多于市人之言语。使天下之人，不敢言而敢怒，独夫之心，日益骄固。戍卒叫，函谷举，楚人一炬，可怜焦土。

灭六国者，六国也，非秦也。族秦者，秦也，非天下也。嗟乎！使六国各爱其人，则足以拒秦。使秦复爱六国之人，则递三世可至万世而为君，谁得而族灭也？秦人不暇自哀，而后人哀之；后人哀之而不鉴之，亦使后人而复哀后人也。

望故园赋

余固秦人兮故园秦地，念归途之几里。诉余心之未归兮，虽系日而安至。既操心之大谬，欲当时之奏技。技固薄兮岂易售，矧将来之岁几。人固有尚，珠金印节，人固有为，背憎面悦，击短扶长，曲邀横结。吐片言兮千口莫穷，触一机而百关俱发。嗟小人之颛蒙兮，尚何念于逸越。余之思归兮，走杜陵之西道。岩曲天深，地平木老。陇云秦树，风高霜早，周台汉园，斜阳暮草。寂寥四望，蜀峰联嶂，葱茏气佳，蟠联地壮。繚粉堞于绮城，矗未央于天上。月出东山，苔扉向关，长烟苒惹，寒水注湾。远林鸡犬兮，樵夫夕还。织有桑兮耕有土，昆令季强兮乡党附。怅余心兮舍兹而何去？忧岂无念，念至谓何？愤愠悽悄，顾我则多。万世在上兮百世居后，中有一生兮孰为寿夭？生既不足以纫佩兮，顾他务之纤小。赋言归兮，余之忘世，徒为兮纷扰。



晚晴赋并序

秋日晚晴，樊川子目于郊园，见大者小者，有状类者，故书赋云：

雨晴秋容新沐兮，忻绕园而细履。面平池之清空兮，紫阁青横，远来照水。如高堂之上，见罗幕兮，垂乎镜里。木势党伍兮，行者如迎，偃者如醉，高者如达，低者如跂。松数十株，切切交风，如冠剑大臣，国有急难，庭立而议。竹林外裹兮，十万丈夫，甲刃撙撙，密阵而环侍。岂负军令之不敢嚣兮，何意气之严毅。复引舟于深湾，忽八九之红菱，姹然如归，敛然如女，堕蘼艸颜，似见放弃。白鹭潜来兮，邈风标之公子，窥此美人兮，如慕悦其容媚。杂花参差于岸侧兮，绛绿黄紫，格顽色贱兮，或妾或婢。间草甚多，丛者束兮，靡者杳兮，仰风猎日，如立如笑兮，千千万万之状容兮，不可得而状也。若予者则为何如？倒冠落珮兮，与世阔疏。敖敖休休兮，真徇其愚而隐居者乎！

感怀诗一首

高、文会隋季，提剑徇天意。扶持万代人，步骤三皇地。圣云继之神，神仍用文治。德泽酌生灵，沉酣薰骨髓。旄头骑箕尾，风尘蓟门起。胡兵杀汉兵，尸满咸阳市。宣皇走豪杰，谈笑开中否。蟠联两河间，烬萌终不弭。号为精兵处，齐、蔡、燕、赵、魏。合环千里疆，争为一家事。逆子嫁虏孙，西邻聘东里。急热同手足，唱和如宫徵。法制自作



为，礼文争僭拟。压阶螭斗角，画屋龙交尾。署纸日替名，分财赏称赐。刳隍蚺万寻，缭垣叠千雉。誓将付孱孙，血绝然方已。九庙仗神灵，四海为输委。如何七十年，汗赭含羞耻？韩、彭不再生，英、卫皆为鬼。凶门爪牙辈，穰穰如儿戏。累圣但日吁，阍外将谁寄？屯田数十万，隄防常惴惴。急征赴军须，厚赋资凶器。因隳画一法，且逐随时利。流品极蒙虜，网罗渐离弛。夷狄日开张，黎元愈憔悴。邈矣远太平，萧然尽烦费。至于贞元末，风流恣绮靡。艰极泰循来，元和圣天子。元和圣天子，英明汤、武上。茅茨覆宫殿，封章绽帷帐。伍旅拔雄儿，梦卜庸真相。勃云走轰霆，河南一平荡。继于长庆初，燕、赵终舛禡。携妻负子来，北阙争顿颡。故老抚儿孙，尔生今有望。茹鯁喉尚隘，负重力未壮。坐幄无奇兵，吞舟漏疏网。骨添蓟垣沙，血涨漳河浪。只云徒有征，安能问无状。一日五诸侯，奔亡如鸟往。取之难梯天，失之易反掌。苍然太行路，翦翦还榛莽。关西贱男子，誓肉虏杯羹。请数系虏事，谁其为我听。荡荡乾坤大，曈曈日月明。叱起文、武业，可以豁洪溟。安得封域内，长有扈苗征。七十里百里，彼亦何常争。往往念所至，得醉愁苏醒。韬舌辱壮心，叫阍无助声。聊书《感怀》韵，焚之遗贾生。

杜秋娘诗并序

杜秋，金陵女也。年十五，为李□妾，后□叛灭，籍之入宫，有宠于景陵。穆宗即位，命秋为皇子傅姆，皇子壮，封漳王。郑注用事，诬丞相欲去异己者，指王为根，王被罪废削，秋因赐归故乡。



予过金陵，感其穷且老，为之赋诗。

京江水清滑，生女白如脂。其间杜秋者，不劳朱粉施。
老濞即山铸，后庭千双眉。秋持玉斝醉，与唱《金缕衣》。
濞既白首叛，秋亦红泪滋。吴江落日渡，灞岸绿杨垂。联裾
见天子，盼眄独依依。椒壁悬锦幕，镜奁蟠蛟螭。低鬟认新
宠，窈窕复融怡。月上白璧门，桂影凉参差。金阶露新重，
闲捻紫箫吹。莓苔夹城路，南苑雁初飞。红粉羽林仗，独赐
辟邪旗。归来煮豹胎，餍饫不能饴。咸池升日庆，铜雀分香
悲。雷音后车远，事往落花时。燕谋得皇子，壮发绿摩摩。
画堂授傅姆，天人亲捧持。虎睛珠络褙，金盘犀镇帷。长杨
射熊羆，武帐弄哑咿。渐抛竹马剧，稍出舞鸡奇。崭崭整冠
珮，侍宴坐瑶池。眉宇俨图画，神秀射朝辉。一尺桐偶人，
江充知自欺。王幽茅土削，秋放故乡归。觚棱拂斗极，回首
尚迟迟。四朝三十载，似梦复疑非。潼关识旧吏，吏发已如
丝。却唤吴江渡，舟人那得知。归来四邻改，茂苑草菲菲。
清血洒不尽，仰天知问谁。寒衣一匹素，夜借邻人机。我昨
金陵过，闻之为歔歔。自古皆一贯，变化安能推。夏姬灭两
国，逃作巫臣姬。西子下姑苏，一舸逐鸱夷。织室魏豹俘，
作汉太平基。误置代籍中，两朝尊母仪。光武绍高祖，本系
生唐儿。珊瑚破高齐，作婢舂黄糜。萧后去扬州，突厥为阏
氏。女子固不定，士林亦难期。射钩后呼父，钓翁王者师。
无国要孟子，有人毁仲尼。秦因逐客令，柄归丞相斯。安知
魏齐首，见断箠中尸。给丧蹶张辈，廊庙冠峨危。珥貂七叶
贵，何妨戎虏支。苏武却生返，邓通终死饥。主张既难测，
翻覆亦其宜。地尽有何物，天外复何之？指何为而捉，足何
为而驰？耳何为而听，目何为而窥？己身不自晓，此外何思
惟。因倾一樽酒，题作《杜秋诗》。愁来独长咏，聊可以自贻。



郡斋独酌

前年鬓生雪，今年须带霜。时节序鳞次，古今同雁行。
甘英穷西海，四万到洛阳。东南我所见，北可计幽荒。中画
一万国，角角棋布方。地顽压不穴，天回老不僵。屈指百万
世，过如霹雳忙。人生落其内，何者为彭、殤？促束自系
缚，儒衣宽且长。旗亭雪中过，敢问当垆娘。我爱李侍中，
飘飘七尺强。白羽八札弓，碇压绿檀枪。风前略横阵，紫髯
分两傍。淮西万虎士，怒目不敢当。功成赐宴麟德殿，猿超
鸛掠广毬场。三千宫女侧头看，相排踏碎双明珰。旌竿紆紆
旗葐葐，意气横鞭归故乡。我爱朱处士，三吴当中央。罢亚
百顷稻，西风吹半黄。尚可活乡里，岂唯满囷仓。后岭翠扑
扑，前溪碧泱泱。雾晓起凫雁，日晚下牛羊。叔舅欲饮我，
社瓮尔来尝。伯姊子欲归，彼亦有壶浆。西阡下柳坞，东陌
绕荷塘。姻亲骨肉舍，烟火遥相望。太守政如水，长官贪似
狼。征输一云毕，任尔自存亡。我昔造其室，羽仪鸾鹤翔。
交横碧流上，竹映琴书床。出语无近俗，尧、舜、禹、武、
汤。问今天子少，谁人为栋梁？我曰天子圣，晋公提纪纲。
联兵数十万，附海正诛沧。谓言大义小不义，取易卷席如探
囊。犀甲吴兵斗弓弩，蛇矛燕骑驰锋铓。岂知三载几百战，
钩车不得望其墙。答云此山外，有事同胡羌。谁将国伐叛，
话与钓鱼郎。溪南重回首，一迳出修篁。尔来十三岁，斯人
未曾忘。往往自抚己，泪下神苍茫。御史诏分洛，举趾何猖
狂。阙下谏官业，拜疏无文章。寻僧解幽梦，乞酒缓愁肠。
岂为妻子计，未去山林藏。平生五色线，愿补舜衣裳。弦歌
教燕、赵，兰芷浴河湟。腥膻一扫洒，凶狠皆披攘。生人但



眠食，寿域富农桑。孤吟志在此，自亦笑荒唐。江郡雨初霁，刀好截秋光。池边成独酌，拥鼻菊枝香。醺酣更唱太平曲，仁圣天子寿无疆。

张好好诗并序

牧大和三年，佐故吏部沈公江西幕，好好年十三，始以善歌来乐籍中。后一岁，公移镇宣城，复置好好于宣城籍中。后二岁，为沈著作述师以双鬟纳之。后二岁，于洛阳东城重睹好好，感旧伤怀，故题诗赠之。

君为豫章姝，十三才有余。翠茁凤生尾，丹叶莲含跗。高阁倚天半，章江联碧虚。此地试君唱，特使华筵铺。主公顾四座，始讶来踟蹰。吴娃起引赞，低徊映长裾。双鬟可高下，才过青罗襦。盼盼乍垂袖，一声雏凤呼。繁弦迸关纽，塞管裂圆芦。众音不能逐，袅袅穿云衢。主公再三叹，谓言天下殊。赠之天马锦，副以水犀梳。龙沙看秋浪，明月游东湖。自此每相见，三日已为疏。玉质随月满，艳态逐春舒。绡唇渐轻巧，云步转虚徐。旌旆忽东下，笙歌随舳舻。霜凋谢楼树，沙暖句溪蒲。身外任尘土，樽前极欢娱。飘然集仙客，讽赋欺相如。聘之碧瑶珮，载以紫云车。洞闭水声远，月高蟾影孤。尔来未几岁，散尽高阳徒。洛城重相见，嫋嫋为当垆。怪我苦何事，少年垂白须？朋游今在否，落拓更能无？门馆恸哭后，水云秋景初。斜日挂衰柳，凉风生座隅。洒尽满衿泪，短歌聊一书。



冬至日寄小姪阿宜诗

小姪名阿宜，未得三尺长。头圆筋骨紧，两脸明且光。去年学官人，竹马绕四廊。指挥群儿辈，意气何坚刚。今年始读书，下口三五行。随兄旦夕去，敛手整衣裳。去年冬至日，拜我立我旁。祝尔愿尔贵，仍且寿命长。今年我江外，今日生一阳。忆尔不可见，祝尔倾一觞。阳德比君子，初生甚微茫。排阴出九地，万物随开张。一似小儿学，日就复月将。勤勤不自己，二十能文章，仕宦至公相，致君作尧、汤。我家公相家，剑珮尝丁当。旧第开朱门，长安城中央。第中无一物，万卷书满堂。家集二百编，上下驰皇王。多是抚州写，今来五纪强。尚可与尔读，助尔为贤良。经书括根本，史书阅兴亡。高摘屈、宋艳，浓薰班、马香。李、杜泛浩浩，韩、柳摩苍苍。近者四君子，与古争强梁。愿尔一祝后，读书日日忙。一日读十纸，一月读一箱。朝廷用文治，大开官职场。愿尔出门去，取官如驱羊。吾兄苦好古，学问不可量。昼居府中治，夜归书满床。后贵有金玉，必不为汝藏。崔昭生崔芸，李兼生窟郎。堆钱一百屋，破散何披猖。今虽未即死，饿冻几欲僵。参军与县尉，尘土惊劬勩。一语不中治，笞箠身满疮。官罢得丝发，好买百树桑。税钱未输足，得米不敢尝。愿尔闻我语，欢喜入心肠。大明帝宫阙，杜曲我池塘。我若自潦倒，看汝争翱翔。总语诸小道，此诗不可忘。



李甘诗

大和八九年，训、注极虓虎。潜身九地底，转上青天去。四海镜清澄，千官云片缕。公私各闲暇，追游日相伍。岂知祸乱根，枝叶潜滋莽。九年夏四月，天诚若言语。烈风驾地震，狞雷驱猛雨。夜于正殿阶，拔去千年树。吾君不省觉，二凶日威武。操持北斗柄，开闭天门路。森森明庭士，缩缩循墙鼠。平生负名节，一旦如俘虏。指名为锢党，状迹谁告诉。喜无李、杜诛，敢惮髡钳苦。时当秋夜月，日直曰庚午。喧喧皆传言，明晨相登注。予时与和鼎，官班各持斧。和鼎顾予云：“我死有处所。”当庭裂诏书，退立须鼎俎。君门晓日开，赭案横霞布。俨雅千官容，勃郁吾累怒。适属命酈将，昨之传者误。明日诏书下，谪斥南荒去。夜登青泥坂，坠车伤左股。病妻尚在床，稚子初离乳。幽兰思楚泽，恨水啼湘渚。怵怵三闾魂，悠悠一千古。其冬二凶败，涣汗开汤罟。贤者须丧亡，谗人尚堆堵。予于后四年，谏官事明主。常欲雪幽冤，于时一裨补。拜章岂艰难，胆薄多忧惧。如何干斗气，竟作炎荒土。题此涕滋笔，以代投湘赋。

洛中送冀处士东游

处士有儒术，走可挟车𦍒。壇宇宽帖帖，符彩高茜茜。不爱事耕稼，不乐干王侯。四十余年中，超超为浪游。元和五六岁，客于幽、魏州。幽、魏多壮士，意气相淹留。刘济愿跪履，田兴请建筹。处士拱两手，笑之但掉头。自此南走



越，寻山入罗浮。愿学不死药，粗知其来由。却于童顶上，萧萧玄发抽。我作八品吏，洛中如系囚。忽遭冀处士，豁若登高楼。拂榻与之坐，十日语不休。论今星璨璨，考古寒飕飕。治乱掘根本，蔓延相牵钩。武事何骏壮，文理何优柔？颜回捧俎豆，项羽横戈矛。祥云绕毛发，高浪开咽喉。但可感鬼神，安能为献酬。好入天子梦，刻像来尔求。胡为去吴会，欲浮沧海舟。赠以蜀马箠，副之胡罽裘。钱酒载三斗，东郊黄叶稠。我感有泪下。君唱高歌酬。嵩山高万尺，洛水流千秋。往事不可问，天地空悠悠。四百年炎汉，三十代宗周。二三里遗堵，八九所高丘。人生一世内，何必多悲愁。歌阙解携去，信非吾辈流。

送沈处士赴苏州李中丞招以诗赠行

山城树叶红，下有碧溪水。溪桥向吴路，酒旗夸酒美。下马此送君，高歌为君醉。念君苞材能，百工在城垒。空山三十年，鹿裘挂窗睡。自言陇西公，飘然我知己。举酒属吴门，今朝为君起。悬弓三百斤，囊书数万纸。战贼即战贼，为吏即为吏。尽我所有无，惟公之指使。予曰陇西公，滔滔大君子。常思抡群材，一为国家治。譬如匠见木，碍眼皆不弃。大者粗十围，小者细一指。经纬与栋梁，施之皆有位。忽然竖明堂，一挥立能致。予亦何为者？亦受公恩纪。处士常有言，残虏为犬豕。常恨两手空，不得一马箠。今依陇西公，如虎傅两翅。公非刺史材，录当坐岩廊地。处士魁奇姿，必展平生志。东吴饶风光，翠稼多名寺。疏烟亸亸秋，独酌平生思。因书问故人，能忘批纸尾？公或忆姓名，为说都憔悴。



长安送友人游湖南

子性剧弘和，愚衷深褊狷。相舍嚣眾中，吾过何由鲜。
楚南饶风烟，湘岸苦萦宛。山密夕阳多，人稀芳草远。青梅
繁枝低，班笋新梢短。莫哭葬鱼人，酒醒且眠饭。

皇 风

仁圣天子神且武，内兴文教外披攘。以德化人汉文帝，
侧身修道周宣王。远蹊巢穴尽窒塞，礼乐刑政皆弛张。何当
提笔待巡狩，前驱白旆吊河湟。

雪中书怀

腊雪一尺厚，云冻寒顽痴。孤城大泽畔，人疏烟火微。
愤悱欲谁语？忧愠不能持。天子号仁圣，任贤如事师。凡称
曰治具，小大无不施。明庭开广敞，才俊受羁维。如日月癘
升，若鸾凤葳蕤。人才自朽下，弃去亦其宜。北虏怀亭障，
闻屯千里师。牵连久不解，他盗恐旁窥。臣实有长策，彼可
徐鞭笞。如蒙一召议，食肉寝其皮。斯乃庙堂事，尔微非尔
知。向来躡等语，长作陷身机。行当腊欲破，酒齐不可迟。
且想春候暖，瓮间倾一卮。



雨 中 作

贱子本幽慵，多为俊贤侮。得州荒僻中，更值连江雨。
一褐拥秋寒，小窗侵竹坞。浊醪气色严，皤腹瓶罍古。
酣酣天地宽，怳怳嵇、刘伍。但为适性情，岂是藏鳞羽。
一世一万朝，朝朝醉中去。

偶游石盎僧舍

敬岑草浮光，句沚水解脉。益郁乍怡融，凝严忽颓坼。
梅颙暖眠酣，风绪和无力。鳧浴涨汪汪，雏娇村幂幂。
落日美楼台，轻烟饰阡陌。潏绿古津远，积润苔基释。
孰谓汉陵人，来作江汀客。载笔念无能，捧筹惭所画。
任轡偶追闲，逢幽果遭适。僧语淡如云，尘事繁堪织。
今古几辈人，而我何能息。

赴京初入汴口晓景即事先寄兵部李郎中

清淮控隋漕，北走长安道。檣形栉栉斜，浪态迤迤好。
初旭红可染，明河澹如扫。泽阔鸟来迟，村饥人语早。
露蔓虫丝多，风蒲燕岵老。秋思高萧萧，客愁长袅袅。
因怀京洛间，宦游何戚草。什伍持津梁，芻涌争追讨。
翮便讵可寻，几秘安能考。小人乏馨香，上下将何祷？
惟有君子心，显豁知幽抱。



独 酌

长空碧杳杳，万古一飞鸟。生前酒伴闲，愁醉闲多少。
烟深隋家寺，殷叶暗相照。独佩一壶游，秋毫泰山小。

惜 春

春半年已除，其余强为有。即此醉残花，便同尝腊酒。
怅望送春杯，殷勤扫花帚。谁为驻东流，年年长在手。

题安州浮云寺楼寄湖州张郎中

去夏疏雨余，同倚朱栏语。当时楼下水，今日到何处？
恨如春草多，事与孤鸿去。楚岸柳何穷，别愁纷若絮。

过骊山作

始皇东游出周鼎，刘、项纵观皆引颈。削平天下实辛勤，
却为道旁穷百姓。黔首不愚尔益愚，千里函关囚独夫。
牧童火入九泉底，烧作灰时犹未枯。



池州送孟迟先辈

昔子来陵阳，时当苦炎热。我虽在金台，头角长垂折。
奉披尘意惊，立语平生豁。寺楼最寡轩，坐送飞鸟没。一樽
中夜酒，半破前峰月。烟院松飘萧，风廊竹交戛。时步郭西
南，繚径苔圆折。好鸟响丁丁，小溪光汎汎。篱落见娉婷，
机丝弄哑轧。烟湿树姿娇，雨余山态活。仲秋往历阳，同上
牛矶歇。大江吞天去，一练横坤抹。千帆美满风，晓日殷鲜
血。历阳裴太守，襟韵苦超越。鞞鼓画麒麟，看君击狂节。
离袖艤应劳，恨粉啼还咽。明年忝谏官，绿树秦川阔。子提
健笔来，势若夸父渴。九衢林马挝，千门织车辙。秦台破心
胆，黥阵惊毛发。子既屈一鸣，余固宜三刖。慵忧长者来，
病怯长街喝。僧炉风雪夜，相对眠一褐。暖灰重拥瓶，晓粥
还分钵。青云马生角，黄州使持节。秦岭望樊川，只得回头
别。商山四皓祠，心与撝蒲说。大泽蒹葭风，孤城狐兔窟。
且复考《诗》、《书》，无因见簪笏。古训屹如山，古风冷刮
骨。周鼎列瓶罍，荆璧横抛擲。力尽不可取，忽忽狂歌发。
三年未为苦，两郡非不达。秋浦倚吴江，去楫飞青鹖。溪山
好画图，洞壑深闺闼。竹冈森羽林，花坞团宫纈。景物非不
佳，独坐如□纈。丹鹄东为来，喃喃送君札。呼儿旋供衫，
走门空踏袜。手把一枝物，桂花香带雪。喜极至无言，笑余
翻不悦。人生直作百岁翁。亦是万古一瞬中。我欲东召龙伯
翁，上天揭取北斗柄，蓬莱顶上斡海水，水尽到底看海空。
月于何处去，日于何处来？跳丸相趁走不住，尧、舜、禹、
汤、文、武、周、孔皆为灰。酌此一杯酒，与君狂且歌。离
别岂足更关意，衰老相随可奈何！



重 送

手撚金仆姑，腰悬玉辘轳。爬头峰北正好去，系取可汗
钳作奴。六宫虽念相如赋，其那防边重武夫。

题池州弄水亭

弄水亭前溪，艣滟翠绡舞。绮席草芊芊，紫岚峰伍伍。
螭蟠得形势，翬飞如轩户，一镜奁曲堤，万丸跳猛雨。槛前
燕雁栖，枕上巴帆去。丛筠侍修廊，密蕙媚幽圃。杉树碧为
幢，花骈红作堵。停樽迟晚月，咽咽上幽渚。客舟耿孤灯，
万里人夜语。漫流冒苔槎，饥鳧晒雪羽。玄丝落钩饵，冰鳞
看吞吐。断霓天帔垂，狂烧汉旗怒。旷朗半秋晓，萧瑟好风
露。光洁疑可揽，欲以襟怀贮。幽抱吟《九歌》，羁情思湘
浦。四时皆异状，终日为良遇。小山浸石棱，撑舟入幽处。
孤歌倚桂岩，晚酒眠松坞。纡余带竹村，蚕乡足砧杵。塍泉
落环珮，畦苗差纂组。风俗知所尚，豪强耻孤侮。邻丧不相
舂，公租无诟负。农时贵伏腊，簪珥事礼赂。乡校富华礼，
征行产强弩。不能自勉去，但愧来何暮。故园汉上林，信美
非吾土。

题宣州开元寺

南朝谢朓城，东吴最深处。亡国去如鸿，遗寺藏烟坞。



楼飞九十尺，廊环四百柱。高高下下中，风绕松桂树。青苔照朱阁，白鸟两相语。溪声入僧梦，月色晖粉堵。阅景无旦夕，凭栏有今古。留我酒一樽，前山看春雨。

大 雨 行

东垠黑风驾海水，海底卷上天中央。三吴六月忽悽惨，晚后点滴来苍茫。铮铮雷车轴轳壮，矫躩蛟龙爪尾长。神鞭鬼驭载阴帝，来往喷洒何颠狂。四面崩腾玉京仗，万里横牙羽林枪。云缠风束乱敲磕，黄帝未胜蚩尤强。百川气势苦豪俊，坤关密锁愁开张。大和六年亦如此，我时壮气神洋洋。东楼耸首看不足，恨无羽翼高飞翔。尽召邑中豪健者，阔展朱盘开酒场。奔觥槌鼓助声势，眼底不顾纤腰娘。今年□茸鬓已白，奇游壮观唯深藏。景物不尽人自老，谁知前事堪悲伤！

自宣州赴官入京路逢裴坦判官归宣州因题赠

敬亭山下百顷竹，中有诗人小谢城。城高跨楼满金碧，下听一溪寒水声。梅花落径香缭绕，雪白玉珰花下行。萦风酒旆挂朱阁，半醉游人闻弄笙。我初到此未三十，头脑钗利筋骨轻。画堂檀板秋拍碎，一引有时联十觥。老闲腰下丈二组，尘土高悬千载名。重游鬓白事皆改，唯见东流春水平。对酒不敢起，逢君还眼明。云叠看人捧，波脸任他横。一醉六十日，古来闻阮生。是非离别际，始见醉中情。今日送君话前事，高歌引剑还一倾。江湖酒伴如相问，终老烟波不计

